

PRIMICIAS

E prome miya den cuatro minuut



E prome miya den cuatro minuut a wordo corri pa Roger Banister - un ingles di 25 aña - na Oxford, dia 6 di Mei di 1954.

E record mundial tabata estableci riba 4 minuut y 1.3 seconde, pero Banister tabata tin pensa di sobrepasa esaki, coriendo tres etapa di 60 seconde cada un y e ultimo lo e corre te unda su forsa lo permiti'e.

Dos otro coreador - Chris Brasher y Chris Chataway - tabata marcadornan di paso. For di principio di e careda Brasher a cuminsa corre mucho liher, mientras Banister tabata tin un tempo briyante di 1 minuut y 58.2 seconde na mitar di caminda.

Yegando e ultimo etapa Chataway a adelanta hopi, pero na e ultimo 440 yardanan Banister a casi alcanza Chataway cu solamente 1/2 minuut di atraso.

Faltando unicamente 250 yarda, Banister a cuminsa adelanta poco-poco, coriendo manera si su bida tabata di e careda aki. Casi semi-inconciente el a corre e ultimo yardanan y ora el a yega e final, el a puntra f'ey rosea: "Mi a logr'e?"

E cronómetro a duna e contesta riba esaki: 3 minuut y 59.4 seconde.

Aruba:

dushi tera

Warda di Polis

Cada ciudad of pueblo, con chikito cu e ta, tin su Warda di Polis. Un polis mester mantene ordo na e lugar cu e ta traha y duna proteccion na personanan y propiedadnan di e lugar, p.e. ora ladron horta of kibra den bo cas. Ademas su trabao ta pa investigá casonan cu ta castigable y percurá pa tur hende tene nan mes na reglanan di cual nan por wordo castigá, p.e. reglanan di trafico. Tambe un polis ta responsabel pa seguridad di e lugar, informacion y imigracion. Esaki ta djies algun punto, pero e trabao di un polis ta encerá mucho mas. Pesey tin diferente departamentonan, p.e.: Recherchedienst, Departamento di Trafico, Havenpolitie y otronan.

Durante siglo pasá no tabata existi polis na Aruba. E tempo ey tabata e militarnan of schutternan cu ta funcioná como polis. Fort Zoutman mes tabata un tempo Warda di Polis.

Na aña 1929 - tempo cu pueblo tabata tin miedo cu Urbina lo bolbe Aruba - nan a lanta un "burgerwacht" pa evitá un atake y pa protehá e hendenan. E "burgerwacht" aki a tabata voluntarionan di e pueblo mes. Mas cu 100 persona a pone nan mes disponible pa yuda. Durante e tempo ey tabata tin hopi mericano na Aruba pa traha e tankinan di Lago. Hopi biaha tabata tin enfrentamento y bringamento y esaki tabata stroba e tranquilidad di nos isla. Pesey e gezaghebber di e tempo ey - Isaac Wagenmaker - a manda busca 20 militar di Suriname pa reforzá e cuerpo di volun-tarionan. Hopi di nan no tabata carga arma, pues ta peleanan cu man tabata tin.

Dia 10 di October 1929 e cuerpo policial a pasa pa Polis Militar cu ta cai bao Cuerpo policial di Corsow. Y asina a keda pa 20 aña.

Na September 1939 San Nicolas a haya su prome Warda di Polis. Dia 15 di April 1940 e Warda di Polis na Playa a wordo inaugurá. Na 1949 Polis Militar a bolbe cambia pa Burgerpolitie cu na cabez un Commissaris. Lago a lanta su mes polis, esta Lago Brigade, pa tene ordo y combati ladronicianan riba su tereno. Mientrastanto e Cuerpo Policial na Oranjestad a ocupá e edificio nobo pa aña. Despues el a wordo basha abao hunto cu otro edificionan den vecindario pa lanta e prestigioso hotel Sonesta. Na Januari 1988 nos Cuerpo Policial a muda pa nan edificio den Wilhelminastraat.....

ICH



Warda di Polis durante decada 40.



Chabalito

Number 7 - Año VII - Afl. 2,=



BIBLIOTECA NACIONAL ARUBA



3 0993 00183 266 6